

Headlines

1. उपराज्यपाल मनोज सिन्हा होरें बन्ने कन्नै लगदे इलाकें दे पूरे पराते विकास लेई भारत सरकार दे धेइए गी फी पक्का कीता ऐ।
2. सख्त सुरक्षा बंदोबस्तें हेठ अमरनाथें दी सलाना जात्तरा अज्ज बडुलै पहलगाम ते बालटाल दौने दस्तेआ शुरू होई गई ऐ।
3. किश्तवाड़ जिले च कल संज्ञा छिड़े दे टाकरे दे बाद उत्थै तुपाई अभियान जारी ऐ।
4. केंद्री मंत्री राजीव रंजन सिंह होरें कल शेर-ए-कश्मीर एग्रीकल्चर युनिवर्सिटी कश्मीर दा दौरा लाया। जम्मू-कश्मीर च डेरी ते मच्छी पालन दे विकास लेई पूरे सहयोग ते समर्थन दा यकीन दोआया।
5. उपमुख्यमंत्री सुरिंदर चौधरी होरें जम्मू-कश्मीर च गैर कनूनी तौरा पर लेतर बजरी कडुनै आहलें खलाफ सख्ती बरतने दा निर्देश दित्ता ऐ।

<><><><><><>

LG-Border Areas

उपराज्यपाल मनोज सिन्हा होरें बन्ने आहले इलाकें दे पूरे-पराते विकास प्रति केंद्र सरकार दी बचनबद्धता गी फी दोहराया। अरनिया दे चंगिया ग्रांउ च किट्टु गी संबोधित करदे होई उनें एहू गल्ल आक्खी। उनें महाजन फगेत्रा बरादरी दी दाती मां देव स्थान पर मत्था बी टेकेआ। उनें आपरेशन सिंदूर दौरान बन्ने आहले बसनीकें आसेआ दस्सी गेदी दलेरी ते बहादुरी दी सराहना कीती। उनें इस पवित्र स्थान गी धार्मिक सैलसफा दे नक्शे पर आहनने लेई केंद्र सरकार आसेआ बनकदी गैंड पुट्टे जाने दा बी भरोसा दोआया। उनें आखेआ।

<><><><><><>

LG-Chamber Delegation

चैंबर ऑफ कामर्स ते इंडस्ट्री दे इक प्रतिनिधिमंडल नै अपने अध्यक्ष अरूण गुप्ता हुंदी अगुवाई च उपराज्यपाल मनोज सिन्हा हुंदे कन्नै मलाटी कीती। इस प्रतिनिधिमंडल नै उपराज्यपाल होरें गी चला'रदी श्री अमरनाथ जी दी जात्तरा सरबंधी बक्ख-बक्ख मामलें बारै अवगत करोआया। इस दौरान बपार ते कारोबार मुतल्लक मामलें पर बी चर्चा होई। घाटी इंडस्ट्रियल एसोसिएशन कठुआ दे नुमाइंदें बी उपराज्यपाल हुंदे कन्नै मलाटी कीती।

<><><><><><>

SANJY

श्री अमरनाथ जी दी सलाना जात्तरा अज्ज बडुलै सख्त सुरक्षा बंदोबस्तें हेठ जात्तरा दे पैहलगाम ते बालटाल दौने दस्तेआ शुरू होई गई। जात्तरा शुरू होने कोला इक रोज पैहले कल शामी तगर 7 जहार कोला मते श्रद्धालु दौने आधार शिविरें पर मते उत्साह ते शरदा भाव कन्नै उत्थे पुज्जी गेदे हे ते अज्ज बडुलै “बम बम भोले” दे जयकारे लांदे होई उनें अपनी जात्तरा शुरू कीती। मकामी लोक दिल खोलियै शरदालुएं दा सुआगत करा करदे न। ताई जम्मू दे भगवती नगर आहले आधार शिविर थमां अज्ज बडुलै शरदालुएं दा दूआ जत्था 368 गड्डिएं दे काफले च बालटाल ते पैहलगाम लेई रवाना होआ जेदे च कुल 5 जहार 246 शरदालु शामिल न। इनें शरदालुएं च 4 जहार 74 मर्द, 795 महिलां, 19 न्याणे, 24 साधु, 33 साधवियां ते 1 ट्रांसजेंडर शामिल ऐ। इन्दे चा 1 जहार 993 शरदालु बालटाल ते 3 जहार 253 पहलगाम लेई रवाना होए न जेडे कल बडुलै पवित्र गुफा लेई अपनी जात्तरा शुरू करडन।

<><><><><><>

Kishtwar-Encounter

किश्तवाड़ जिले दे जांगली इलाके च कल शामी शुरू होए दा टाकरा, जेड़ा रातीं न्हेरा पौने पर रोकी दित्ता गेआ हा, अज्ज बडुलै लो होंदे गै उत्थै तुपाई आहली कार्रवाई परतियै शुरू होई गेई ऐ। उआं सुरक्षाबलें इलाके च अपना घेरा रात भर पाई रक्खे दा हा ते उत्थे मजूद आतंकवादिएं गी फगड़ने जां मारी मकाने लेई बाद्दू बल पैहले गै सद्दी लैते गेदे न। ध्यानजोग ऐ जे जिले दे छात्रू इलाके च कुच्चल थाहर आतंकवादिएं दी मौजूदगी बारै इक टकोहदी सूह थोने मगरा मकामी पुलस, फौज ते सी.आर.पी.एफ नै इक सांझा अभियान चलांदे होई इलाके गी घेरियै तुपाई आहली कार्रवाई शुरू कीती। इस दौरान उत्थे छप्पे दे आतंकवादिएं गोली चलाई दित्ती जेदे पर जवाबी कार्रवाई च टाकरा भखी पेआ।

<><><><><><>

Ramban-Food

चला'रदी श्री अमरनाथ जी दी जात्तरा दे मद्देनजर रामबन दा जिला प्रशासन खुराक सुरक्षा सरबन्धी मैहकमें दे सहयोग कन्नै रलिए इस गल्ला गी यकीनी बना'रदा ऐ जे जात्तरा पर औने आहले शरदालुएं गी म्यारी ते गुणवत्ता आह्लियां चीजां उपलब्ध होन। मैहकमे नै लंगर लाने आहले, खाने पीने आह्लियां चीजां उपलब्ध करोआने आहलें गी ते दुकानदारें गी आखेआ ऐ जे ओहू अपने आपा गी मैहकमे कन्नै पंजीकृत करोआन। इस जत्त बारै होर जानकारी दिंदे होई रामबन दे खुराक सुरक्षा सरबन्धी अफसर बलबीर सिंह होरें आखेआ।

<><><><><><>

Fisheries

मच्छी पालन, पशुपालन ते डेयरी सरबन्धी केंद्री मंत्री राजीव रंजन सिंह होरें आखेआ जे केंद्र सरकार जम्मू-कश्मीर च डेयरी ते मच्छी पालन सैक्टर गी बढावा देने लेई हर संभव सहायता प्रदान करोग। एह गल्ल मंत्री होरें राई-बाई विान ते तकनीकी सरबन्धी यूनिवर्सिटी स्कॉस्ट कश्मीर च इक कार्यक्रम गी संबोधित करदे होई आक्खी। केंद्री मंत्री होरें जम्मू-कश्मीर च राई-बाई आहले क्षेत्र च आधुनिकता आहनने ते करसान समुदाय दे कल्याण प्रति केंद्र सरकार दी बचनबद्धता गी दोहराया। उनें गलाया जे हर जिले च डेयरी उत्पादें दी बिक्री आहले केंद्र कायम करने लेई मंत्रालय पूरी मदद देग। मंत्री होर 2 दिनें दे कश्मीर दौरे पर न।

<><><><><><>

Dy. CM Mining

उपमुख्यमंत्री सुरेंद्र चौधरी होरें जम्मू-कश्मीर दरेआएं चा गैर कनूनी तौर पर खनिज ते लेत्तर बजरी कडुने पर पूरी पाबंदी लाने लेई सरकार दी बचनबद्धता गी फी दोहराया। एहू गल्ल उनें श्रीनगर च खाने सरबन्धी मैहकमे दी उच्च सतह दी बैठक दी अध्यक्षता करदे होई आक्खी। उनें खित्ते दे कुदरती संसाधनें दी सुरक्षा करने प्रति सरकार दी बचनबद्धता दोहराई। उनें गैर कनूनी तौर पर खनन करने आहलें खिलाफ सख्त कार्रवाई दी गल्ल आक्खी। उनें नेहू लोके गी दनां बी नेई बर्दाश्त करने आहले नजरिए गी अपनाने लेई आखेआ। उपमुख्यमंत्री होरें सौहगा कीता जे कुसै बी खिलाफवर्जी पर कनून तैहत सख्त कार्रवाई कीती जाग।

<><><><><><>

Rana/Dar-Irrigation

जलशक्ति मैहकमे दे मंत्री जावेद अहमद राणा ते राई-बाई मंत्री जावेद अहमद डार होरें कल सिविल सचिवालय श्रीनगर च लगगी दी इक बैठक च पूरे केंद्र शासित प्रदेश च सिंचाई सुविधाएं सरबन्धी स्थिति दा व्यापक जायजा लैता। एहू बैठक करसान समुदाय गी पेश आवा'रदिएं सिंचाई सरबन्धी समस्याएं दी पछोक्कड़ै च सद्दी गेदी ही। बैठक च करसानें गी भरोसेमंद, सिंचाई सुविधाएं दी दस्तयाबी जकीनी बनाने लेई मैहकमे आसेआ अपनाए जाने आहले तरीकाकार बारै बी

तफसीली जानकारी सांझी कीती। जावेद राणा होरें इस मौके निर्देश जारी कीता जे सिंचाई सरबन्धी मसलें दा नबेडा करने लेई तुरत असरदार उपाऽ कीते जान तां जे करसानें गी कुसै चाल्ली दी दिक्कत-परेशानी पेश नेई आवै।

<><><><><><>

Estimates Comm. PWD

मैहकमा पी.डब्ल्यू.डी दी कारकरदगी ते एहदे पैहे दे स्हेई चाल्ली इस्तेमाल दा मूल्यांकन करने लेई कल श्रीनगर विधानसभा परिसर च अनुमाने कयाफें सरबन्धी सदन दी समिति दी बैठक लग्गी जेदी अध्यक्षता समिति अध्यक्ष शमीम फिरदौस होरें कीती जिसले जे एहदे मिम्बर अब्दुल मजीद भट्ट लारमी, गुलाम मोहिउद्दीन मीर, पवन कुमार गुप्ता, प्रो. गारू राम भगत, डॉ. शफी अहमद वाणी, चंद्र प्रकाश गंगा ते प्यारे लाल शर्मा बी मौजूद हे। कमेटी अध्यक्ष शमीम फिरदौस होरें जोर देइयै आखेआ जे मैहकमे दे कम्मै-काजै पर फंड जारी करने ते एहदे इस्तेमाल पर नेइमी तक्क रक्खी जा तां जे सब्बने विकास परियोजनाएं गी तौले तोड़ चाढ़ेआ जाई सकै जेड़ियां जम्मू-कश्मीर दे बक्ख-बक्ख हिस्सें च पीडब्ल्यूडी आसेआ हत्थै च लैतियां गेदियां ना।

<><><><><><>